

四庫全書

集部

欽定四庫全書

明詩綜卷九十五

翰林院檢討朱彝尊編

朝鮮

下

林悌

一首

靜志居詩話自悌至李仁老詩見朝鮮  
采風錄其官爵世次未詳姑系於此

中和塗中

羸驂馱倦客日暮發黃州可惜踏青節未登浮碧樓佳

人金縷曲江水木蘭舟寂寂生陽館孤燈夜似秋

白光勲 一首

縣津夜泊

旅泊依津口重遊屬暮年鐘聲隔岸寺人語渡湖船  
月上蒹葭遠燈橫島嶼連夜深風更急落鴈不成眠

崔壽城 一首

驪江

日暮滄江上天寒水自波孤舟宜早泊風浪夜應多

趙希逸 一首

謫中

歸心日夜闕以東歸計即今還墮空一年春動萬里外  
孤山月出千林中愁來但覺此身遠醉後不知吾道窮  
瓊州雷州何許地古人今人同不同

張漢瞻云  
意致磊落

林億齡 一首

送友還山

塵土無憂染素衣蕭條石徑接柴扉飄然又作抽簪計

夢逐白鷗江上飛

奇邁一首

直禁詠懷

南山松栢幽北山烟霧深遊子暮何之庭樹生秋陰歸  
雲度遙峰宿鳥橫前林幽懷杳不極清風吹我襟

似孫愷云

韋柳遺韻

金塗一首

寄友

楊花落盡草萋萋  
楚客傷離思轉悽  
佳節一年寒食過  
亂山千疊子規啼  
虞翻去國身全老  
王粲登樓賦幾題  
相約天涯回白首  
昭陽江上夕陽低

申欽一首

寄友

廣陵三月已飛花  
漢水孤帆落日斜  
新結茅茨分洞府  
欲隨麋鹿作生涯  
平波細雨催耕讀  
曲水游魚上釣叉  
舉世盡從忙裏過  
似君行樂獨堪誇

權輿 一首

清明

淑氣催花信，輕黃著柳絲。  
人烟寒食後，鳥語晚晴時。  
老去還多事，春來嬾賦詩。  
京華十年夢，惆悵只心知。

趙昱 一首

贈鑑湖主人

十年長掩故山扉，塵土東華幾染衣。  
想得鑑湖春夜月，子規應喚不如歸。

李孝則 一首

烏嶺

秋風黃葉落紛紛  
主屹山高半沒雲  
二十四橋嗚咽水  
一年三度客中聞

柳永吉 一首

福泉寺

落葉鳴廊夜雨懸  
佛燈明滅客無眠  
仙山一到傷春暮  
烏帽欺人二十年



魚無迹 一首

逢雪

馬上逢飛雪，孤城欲閉時。  
漸能消酒力，渾欲凍吟髭。  
落日無留景，栖禽不定枝。  
灞橋驢背興，吾與故人期。

李 嶸 一首

題僧軸

流雲山口草萋萋，夜逐香烟到水西。  
醉後高歌答明月，江花落盡子規啼。

金宗直

一首

佛國寺

為訪招提境松間紫翠重青山半邊雨落日上方鐘語  
與居僧軟杯隨古意濃頽然一榻上相對鬢髮鬆

李承召

一首

詠燕

畫閣深深簾額低雙飛雙語復雙棲綠楊門巷春風晚  
青草池塘細雨迷趁蝶有時穿竹塢壘巢終日啄芹泥

託身得所誰相侮養子年年羽翼齊

鄭 碣 一首

聞笛

迢迢沙上人初疑雙白鷺忽聞橫笛音寥亮江天暮

朴文昌 一首

題郭山雲興館畫屏

萬頃滄波欲暮天將魚換酒柳橋邊客來問我興亡事

笑指蘆花月一船

李達一首

病中對雨

花時人病閉門深  
強折花枝對酒吟  
怊悵流光夢中過  
賞春無復少年心

李植一首

泊漢江

春風急水下輕艘  
朝發驪陽暮漢江  
篙子熟眠雙櫓靜  
青山無數過船窓

朴 澗 一首

平壤大同館題壁

高句驪起漢鴻嘉宮殿遺墟草樹遮惆悵乙亥文德死  
國亡非為後庭花

詩話書序賄肅慎之命孔安國傳云海東諸國  
駒驪扶餘馱貊之屬武王克商皆通道焉按駒  
驪主朱蒙漢元帝建  
昭二年始建國號

姜克誠 一首

湖堂早起

江日曉未生蒼茫十里霧但聞柔櫓聲不見舟行處

鄭之升 一首

留別

細草閒花水上亭綠楊如畫掩春城無人為唱陽關曲  
惟有青山送我行

姜渾 一首

贈妓

雲鬟梳罷倚高樓鐵笛橫吹玉指柔萬里關山一輪月

數行清淚落伊州

金淨一首

旅懷

江南殘夢晝厭厭  
愁逐年華日日添  
鶯燕不來春又去  
落花微雨下重簾

鄭知常一首

醉後

桃花紅雨鳥喃喃  
繞屋青山間翠嵐  
一頂烏紗慵不整

醉眠花塢夢江南

李仁老 一首

題杏花鸚鵡圖

欲雨未雨春陰垂杏花一枝復兩枝問誰領得春消息  
惟有鸚鵡之與鵲之

李子敏 一首

子敏未詳何官

姚園客云萬曆庚戌仲秋值朝  
鮮貢使遇人贈高麗紙扇上題

有詩稱辛丑秋  
東岳李子敏作



賀聖節詩

九達初日五雲覃虎拜彤庭百辟參黼黻星辰璇極北  
梯航玉帛越裳南河清適際千年一嵩壽齊呼萬歲三  
遐壤小臣陪舞獸內尊偏倚主恩酣

朝鮮主試官一首

嘉靖七年朝鮮人遇風飄至南通州被拘于守  
禦所訊之乃其國主試官有詩

詩

白浪滔滔上接空布帆十幅不禁風此身若葬江魚腹  
萬里孤臣一夢中

孫谷集詩

五首

不詳其名

渡清川江

安州城外水如天立馬沙頭喚渡船帆帶晚烟依草岸  
鴈迷殘日下蘆田長塗旅客思歸計向老筋骸憶少年  
始信在家貧亦好近來雙鬢轉蕭然

題清道李家壁

南來數月計多違，節序如流已授衣。  
旅舍不堪黃葉落，暮天遙望白雲飛。  
沙梁鴈下寒江渚，門巷烟深苦竹扉。  
唯有同來野僧在，病吟相對話西歸。

客懷

此身那復計西東，到處悠悠逐轉蓬。  
同舍故人流落後，異鄉新歲亂離中。  
歸鴻影度千峰雪，殘角聲飛五夜風。  
惆悵水雲關外路，漸看芳草思無窮。

贈樂師許憶鳳

雙眉覆眼鬢蕭蕭曾捻梨園紫玉簫  
移向瑤臺彈一曲曲終垂淚說先朝

悼亡

妝奩蟲網鏡生塵門掩桃花寂寞春  
依舊小樓明月在不知誰是卷簾人

梅月堂詩一首

和鍾靈山居詩

蛺蝶雙雙舞藥畦  
薔薇架架采登梯  
一叢枸杞花初徧  
五桠人蓂葉已齊  
翠竹林中香麝睡  
紫荊枝上畫眉啼  
千峰昨夜疎疎雨  
不分南池漲入溪

洛師浪客

一首

安定館北驛

四月關門路風沙氣慘悽  
河邊春鴈盡林外曉鶯啼  
去國魂長往思家意轉迷  
羸驂經左道今日向安西

無名氏

一首

沈駙馬碧波亭

貴主華亭入翠微，碧牕朱栱有光輝。  
春來波暖魚龍出，夜久星疎烏鵲飛。  
海上乘查時貫月，江邊積石舊支機。  
當筵勸酒先投轄，不醉應知客不歸。

月山大君娉一首

詩話娉詩一首見吳子魚朝鮮詩選近有人云  
應是朝鮮女子按說文廣韻均不載有娉字惟  
玉篇有之注徒寧切和色也樂府詩集漢辛延年羽林郎篇不意金吾子娉娉過我廬娉娉字  
並用始此江南弄和云陽春路娉娉出綺羅喬知之詩明珠十斛買娉娉杜甫詩不嫁惜娉娉

劉長卿不知娉婷色回照今何似韓愈詩砧影  
伴娉婷白居易詩明妃風貌最娉婷李商隱詩  
娉婷小苑中羅虬詩大都相似更娉婷則唐人  
固相沿用之戴考丁度集韻姁或作婷可補廣  
韻之闕采風集妝婷詩婷上冠以月山大  
君字當是東國尊稱殆非民間女子也

### 古寺尋花

春深古寺燕飛飛深院重門客到稀我正尋花花盡落  
尋花翻為惜花歸

成氏一首

### 竹枝辭

灤東灤西春水長郎舟已去向瞿塘巴江峽裏啼猿苦  
不到三聲已斷腸

俞汝舟妻

一首

別贈

恨別逾三歲衣裘獨禦冬秋風吹短鬢寒鏡入衰容旅  
夢風塵際離愁關塞重徘徊思遠近流歎滿房櫳

趙媛妾李氏

二首

詩話媛官學士承旨死後亂妾李自號玉峰主人詩如  
兩兩鸕鷀失舊磯衝魚飛入菰蒲去是亦佳句也



采蓮曲

南湖采蓮女，日日南湖歸。  
盪槳嬌無力，水濺越羅衣。  
無心却回櫂，貪看鴛鴦飛。

自適

虛檐殘漏雨，纖纖枕簟輕。  
寒曉漸添花，落後庭春睡美。  
呢喃燕子要開簾。

許景樊 五首

景樊字蘭雪，封筠之妹。適進士金成立，後成立

殉國難遂為女道士有集

陳卧子云許氏學李氏而合作有盛唐之

風外藩女子能爾可

見本朝文教之遠

詩話明閨秀詩類多偽作轉相附會久假不歸  
如今日相逢白司馬構前重與訴琵琶吳中范  
昌朝題老伎卷也詩載皇明珠玉而謬云鐵氏  
二女寒氣逼人眠不得鐘聲催月下迴廊三泉  
王佐宮詞也詩載石倉詩選而假稱宮人媚蘭  
泉流不歸山羅文毅作而謂甄節婦詩誰言妾  
有夫高侍郎作而謂章恭毅母他若忽聞天外  
玉簫聲寧獻王權之詠權妃即指為權貴妃作  
風吹金鎖夜聲多羅翰林璟之詠秋怨遂誣為  
王莊妃詞甚至析情字為小青吊青冢者過孤  
山而流連託聯句於薛濤刻濤集者綴卷尾而  
剗刪助談小說貽笑通人吾於許景樊之詩見

其篇章句法宛然嘉靖七子之體裁未應  
風教之訖符合如是不能無鑿鼎之疑也

望仙謠

王喬招我游期我崑崙墟朝登玄圃峰遙望紫雲車雲  
車何煌煌玄圃路茫茫倏忽凌天漢翻飛向扶桑扶桑  
幾千里風波路阻長吾欲舍此去佳期安可忘君心知  
何許賤妾徒悲傷

次伯兄高原望高臺韻

層臺一柱壓嵯峨西北浮雲入塞多鐵峽霸圖龍已去

穆陵秋色鴈初過山迴大陸吞三郡水割平原納九河  
萬里登臨愁日暮醉憑青嶂獨悲歌

次仲兄筠高原望高臺韻

崔嵬雲棧接青霄峰勢侵天作漢標山脈北臨三水絕  
地形西壓兩河遙烟塵暮卷孤城出苜蓿秋深萬馬驕  
東望塞垣鼙鼓急幾時重起霍嫖姚

效崔國輔

妾有黃金釵嫁時為首飾今日贈君行千里長相憶

雜詩

精金明月珠贈君為雜佩不惜棄道旁莫結新人帶

安南

詩話安南曾為郡縣漸文治者深而其國人詩  
選家多置不錄予從李文鳳越嶠集擇其詞旨  
馴雅者  
著於篇

國王黎灝一首

灝一名思誠天順四年國人所立卒私謚淳皇

帝僭號聖宗

送錢學士溥歸朝

五嶺天高瘴霧開  
詔書飛下越王臺  
萬年重紀黃龍瑞  
九譯爭看白雉來  
曉日珠厓標柱在  
秋風銀漢使查回  
吾君若問交南事  
久已傾心仰上台

黎景微一首

景微文職大頭目  
僭左僕射

奉贈錢學士

紫殿承恩入夢頻  
歸鞭裊裊向天津  
綈袍色映千山曉

玉節光回萬井春五嶺風輕金勒緩三湘月白錦帆新  
夜闌宣室如前席為道交南共帝臣

阮直一首

直爵里未詳

送錢學士歸朝

曉日初開瘴霧空歸程馬首正秋風知音豈限珠厓北  
惜別那禁珥水東上國有人還獻納遐方無事賴忻懽  
他年兩地如相憶萬里懸情寄塞鴻

黃清 一首

清僭吏曹侍郎

送錢學士還朝

公望端堪邁俊豪  
遠持使節効賢勞  
九霄日月瞻依近  
萬里江山興詠高  
別酒頻斟情戀戀  
歸心莫遏水滔滔  
自從回首天南後  
幾度懷人正鬱陶

黎念 一首

念大頭目



送湛內翰還朝

綸音讀罷紫泥封  
回首蓬萊第一峰  
望外交關千里月  
夢中帝闕五更鐘  
星查迢遞歸程遠  
雲樹參差別思濃  
南浦吟成憑寄語  
滔滔江漢共朝宗

阮澤民 一首

澤民爵里未詳

送湛內翰還朝

目送星輶萬里旋  
那堪惜別思淒然  
交關此日分歧後

南北春風共一天

安南使臣一首

題南康縣南野

鼓報黃昏各泊船  
咿咿軋軋櫓聲連  
一隻見鴈滄江外  
幾箇人家楊柳邊  
紅日落殘鈎挂月  
白雲卷盡鏡磨天  
安南萬里朝天客  
暫借郵亭一夕眠

占城

貢使二首

進貢初發占城

行盡河橋柳色邊  
片帆高挂遠朝天  
未行先識歸心早  
應是燕山有杜鵑

江樓留別

青嶂俯樓樓俯渡  
遠人送客此經過  
西風揚子江邊柳  
落葉不如離思多

詩話近峰聞略載占城使臣寓蘇州之天王堂  
問葵花何名  
人給之曰一大花也  
即題詩曰花  
於木槿渾相似  
葉比芙蓉只一般  
五尺闌干遮  
不住獨留一半與人看  
按此乃寶應陶成題李

西涯館中  
葵花之作

日本

噶哩嘛哈

或作答黑  
麻一首

詩話高帝惡倭不恭示以欲征之意日本進表  
辭頗不遜命噶哩嘛哈上表帝問其風俗答五  
言詩既而絕其貢考日本疆域時拓地八道六  
十六州六百一十三郡八十二浦宜其不知漢  
大而云國比中原國也若其人多壽就國王論  
如神武天皇一百二十七歲孝昭天皇一百十  
八歲孝安天皇一百三十七歲孝靈天皇一百  
十五歲孝元天皇一百十七歲開化天皇一百  
十五歲崇仁天皇一百二十歲垂仁天皇一百  
四十歲景行天皇一百有六歲成務天皇一百

有七歲神功天皇百歲應神天皇仁德天皇俱  
百有十歲雄略天皇百有四歲降年之永中土  
所希所云人同上古人言雖大而非夸矣惟是  
國俗無冠國王但著烏帽直而頂圓銳高半尺  
以綃為之男女笠用蒲或竹或椶木謂為唐制  
度夫豈其然至若天皇之子娶於其族夫死妻  
立兄死妹立子死母立何禮之  
有明祖絕其貢使不亦宜乎

答大明皇帝問日本風俗

國比中原國人同上古人衣冠唐制度禮樂漢君臣銀  
雍篋清酒金刀繪紫鱗年年二三月桃李自陽春

普福一首

宣德七年倭船入貢凡九艘其使普福迷失於  
樂縣沙窩藤嶺獲解

被獲歎懷

來游上國看中原細嚼青松咽冷泉慈母在堂年八十  
孤兒為客路三千心依北闕浮雲外身在西山返照邊  
處處朱門花柳巷不知歸日是何年

中心叟一首

叟日本使臣

弔郭璞墓

遺音寂寂鎖龍門此日青囊竟不聞  
水底有天行日月墓前無地拜兒孫  
秋風野寺施香飯夜月漁燈照斷魂  
我有誄歌招不返停船空見白鷗羣

詩話葬師言禍福多本於景純之經然試與百人分謀之無一人同者所云龍穴砂水向背如柶鑿齟齬之不相入其說業已難擇加以日者配以年神方煞吉神祇百二十凶神倍之規避實難以是不克葬者多矣世傳景純墓在金山足過於說奇沈啓南詩氣散風衝豈可居先生埋骨理何如日中數莫逃兵解世上人猶信葬書如叩晨鐘寐者可以發深省矣中心更墓前

無地拜兒孫一語亦足發笑詩載廬陵胡經用  
甫金山志志成於正德辛巳大侍詔徵仲序之

無名氏 一首

春雪

昨夜東風換北風釀成春雪滿長空梨花樹上白添白  
杏子枝頭紅不紅鶯問幾時能出谷燕愁何日得泥融  
寒冰鎖却秋千架路阻行人去不通

釋天祥 三首

寄南珍



上人居處僻心與石泉清道在從違俗身閒不用名空  
階松子落雨徑蘚花生怪得稀相見年來懶到城

長安春日

何事長安客春來思易迷樂游原上草無日不萋萋

榆城聽角

十年游子在天涯一夜秋風又憶家恨殺葉榆城上角  
曉來吹入小梅花

釋機先

二首

送別

天書召賈生匹馬出滇城  
白首相逢處青雲送別情  
山經巫峽盡水到楚江平  
好獻治安策殷勤答聖明

挽逮光古先生

昨日來過我今朝去哭君  
那堪談笑際便作死生分  
曠達陶徵士蕭條鄭廣文  
猶憐埋骨處西北有孤雲

明詩綜卷九十五

欽定四庫全書

明詩綜卷九十六

翰林院檢討朱彝尊編

潯州士女

相思曲 二首

妹相思不作風流待幾時只見風吹花落地不見風吹

花上枝

王貽上云雖侏儻之音與樂府子夜讀曲相近

妹相思蜘蛛結網恨無絲花不年年長在樹孃不年年

伴女兒

靜志居詩話此曲載吳洪粵  
風續九是潯州士女所歌

廣東歌堂詞

道別

三首

采蓮去時江水深  
采蓮歸時江樹陰  
中間日出西邊雨  
記得有情人  
在心

歲晚天寒郎不回  
廚中烟冷雪成堆  
竹篙燒火成長炭  
炭到天明半作灰

老龍山下有狂風老龍山上月朦朧檳榔勸郎郎不醉  
姑負奴脣一點紅

翰林館課

原心亭詩

鬱鬱松樹枝肅肅冬日陰孤亭弘且敞乃在鳳池潯鳳  
池超人寰萬籟無一音暫息塵中轍因鮮俗慮侵端坐  
邈宇宙掩帙忘古今頓令羣動祛見此方寸心金門足  
大隱豈必謝纓簪

白頭閒話

感述

詩語是篇不知誰氏所作或有感於焦黃中張懋修輩乎

御史大夫湯御史大夫周兩人皆酷吏寸心操戈矛蔽賢者無後其語蓋有由如何安世禹顯爵封通侯有子驛且角乃產自犁牛思之復思之天道亦有私

單縣老父

漢河懷古

漢河在單縣源出汴水下流通沛以漢高還沛曾陟此故名

王氣豈沛間濬源自單父風雲昔飛揚萬乘歷茲土富  
貴歸故鄉意本重瞳羽誰知錦衣行在漢不在楚

粉墨春秋

非仲藏宋溫日觀蒲萄

錢塘江潮三日斷翠華遙遙六宮散莽茫黑霧覆厓山  
二龍無聲泣天畔衣冠南渡靖康年忍見旄頭明夜半  
冬青雪冷子規啼尚有遺民溫日觀閭閻姓名知是誰  
有身但向浮屠窟酒酣獨抱支離叟罵賊猶存目光爛



依稀八法素師傳蒲萄餘技留篇翰馬乳曾無塞上塵  
鰕鬚尚似江南岸涼雲不共荔支殘景風難並櫻桃薦  
莫道驪珠顆顆圓長弘碧血光零亂三百餘年歎息同  
何人對此非河漢借問苦心愛者誰我友張君獨悲歎  
神物一去何繇還觸目皆非氣凋換吁嗟張君且勿歎  
墨花會見虹蜺燦涼州美酒共天家大叫忠魂歌復旦

瀟湘集

洞庭秋月

纖雲不動金波浮，冷光萬里開清秋。  
青山一髮渺無際，天影落鏡星河流。  
中流無人萬籟寂，夜深往往魚龍出。  
何人長笛在扁舟，水遠天長露華白。

渭臺漁父

喜父純卿至

何日離青海，春過北斗城。  
亟須譚間闊，深足慰交情。  
雨雪辭闕塞，風塵送客程。  
投荒君最苦，早有二毛生。

潼川碑

題石鏡寺

州志成化三年蜀僧繼圓  
於草莽中得碑刻此詩

昔日朱輪守經過釋子家柱間留墨蹟泉下隔年華雲  
去空雕檻風來卷白沙江山誰似畫每到動吁嗟

天目游人

宿重雲菴

烟蘿一徑通宴坐白雲中樹影晴浮水秋聲半在空疎  
鐘山際月高枕竹邊風竟夕渾無寐清談對遠公

藕花社僧

嘉興白蓮寺僧有藕花社詩集不知其名

山居

滄海歸來日貪看麋鹿羣  
意虛含遠嶂屋破補重雲  
夕鳥吟邊過春蔬雨後分  
不須憐聞寂清楚隔山聞

玉華山樵

不知何許人洪武初寓東陽之東山披麻戴笠  
散步閒吟于山水間終不肯言姓氏或云陳友  
諒客友諒亡遁跡至此遺詩百篇孫石臺楊序

之名玉華遺稿

和韻荅玉山呂誠中

窮塗往往白頭新誰謂綈袍念故人此日不須辭舊雨  
空山聊自度殘春艱難作客仍多病生死無家任此身  
二十年來相憶處幾回月夕與風晨

野亭老父

桐城劉燾成化間與友人同赴省應選貢塗中  
風雨驟至因解裝暫憩野亭共賦送春詩忽一

老父衣蓑荷笠至聞吟詩亦請筆硯頃刻詩成  
云云

怨風怨雨總皆非風雨不來春亦歸蜀魄啼殘花影瘦  
吳蠶喫盡柘陰稀枝頭綠軟梅初熟口角黃乾燕學飛  
我亦欲歸歸未得擔頭猶挂舊蓑衣

萊山樵者

濬縣眺望

河流遠徙大伾存極目中原野色昏禾黍油油迷故國

羝羊逐逐過前村黃花冷笑三秋客紅葉初飛十畝園  
賴有淹留同調在芒芒禹跡試重論

明詩鼓吹

題金陵沙士清樂清軒

竹裏行廚竹外門宛然風景似山村石闌柳暗藏新雨  
詩壁苔荒沒舊痕林下鳥鳴花自落溪頭鹿過水偏渾  
晚來半掩東軒下一枕梨雲鎖夢魂

戴斗夜談

書玉田行館

老去年華暗自驚殊方節序倍關情蕭條旅館孤燈宿  
迢遞歸塗白髮生海甸星河分歲色山樓鼓角動春聲  
柳盤柏徑誰相識悵望鄉原北斗橫

丹川

李時遠云丹川不知何許人曾官給  
舍轉御史集不書撰人無前後序

棧道早行效白香山體

連雲石磴曉蒼蒼天險分明百二強萬里西南通鳥道  
雙旌上下轉羊腸一溝流水一溝竹幾樹垂楊幾樹桑



登覽不知行役倦半生詩債却慵償

雲谷樵夫

書大道寺壁

西華雲臺去路長投閒翻為看山忙  
十年有夢尋中岳四月披雲過太行  
清世誰能便吏隱幽栖吾獨愛僧房  
昨來不寐焚香坐讀盡楞嚴夜未央

黃州志

赤壁寫懷

武昌東下次江皋赤壁磯頭艤畫橈廢壘烟消荒舍合  
橫江鶴去碧天遙岸邊漁父疑殘炬水底龍吟憶洞簫  
往事千年增感慨荻花楓葉晚蕭蕭

昌平州志

仙人洞

石洞窅且深花落無人埽仙翁去不還何處尋瑤草

虎谷

虎谷名金山客行初未識日午山下過人面

一作黃金

色

銀山

銀山本在北萬丈青雲梯曉見居庸雪銀山忽在西  
龍泉

瀾瀾山下泉滌洄白如玉清以濯吾纓濁以濯吾足  
安濟橋

石梁跨飛虹水清魚可數莫謂非通津亦有江南估  
長安可游記

題西山清涼寺壁

山僧汲空潭驚起二龍子  
百里雲冥濛三日雨不止

青鞵踏雪志

題西山水盡頭

雙流決決鳴石根失其一  
棄穰於此中應從玉泉出

南靖老人

題壁

青青千里草隱隱獨家村  
日暮客投宿山深虎守門

吳下人

詩

僕夫不識路踟躕道傍久寒風吹衣襟落日看馬首

屠生 一首

蕭山諸生屠姓失其名居近西子祠題詩於壁  
是年學使者夢一婦人謂曰吾西施也生未入  
五湖而蕭山屠生輒妄言其為吾斥之既按部  
詢生生大驚誦其詩歎曰詩固佳然已失實乃

令生詣祠謝已為文以祀之

題西子祠壁

紅粉溪邊石年年漾落花五湖烟水濶何處浣春紗

南潯祇園寺詩

贈老僧

清溪通笠澤地以水為鄉竹青三日雨僧白一頭霜

張叟

叟嘉興人不知名

秋思

江上芙蓉開江上芙蓉謝  
開謝總秋風江流無日夜

盱眙女郎

題壁

短袖籠春去低鬟明月中  
逢人惟有淚不敢說遼東

正德中朝士

上長沙相公

才名直

一作少

與斗山齊伴食

一作三考

中書日又

一作已

西回

首湘江春草綠鷓鴣啼罷子規啼

石淙集附錄

題邠州郵亭壁

太宰西征秉將權三秦豪傑滿軍前  
中筵笑指金貂客盡是當年舊執鞭

永壽監軍莊郵亭題壁

金符玉節催征騎赤日炎天渡大江  
塞上清風連瀚海六韞驚見舊旌幢



荆先生

不知何許人客濟寧人有持白團扇撲蠅為血  
所漬因繪為紅葉題詩云云人遂目之為荆紅  
葉

題紅葉

新霜楓葉醉殷紅記得題詩出後宮繞遍御溝尋不見  
被風吹入月輪中

黃州志

武磯山

寂寞武磯山上樹蕭條  
邏旱水中天垂楊不管人間事  
猶自青青兩岸邊

廣西舊志

題義寧華嚴寺

跨鶴歸來不計年  
洞中流水綠依然  
紫簫吹徹無人見  
萬里西風月滿天

殊勝寺道人

嘉靖初平望鎮殊勝寺有一道人來游題其壁  
云云後倭人至鎮寺首焚毀

題壁

我自蓬萊跨鶴回山僧不遇意徘徊時人莫解菩提寺  
三十年餘化作灰

福教寺僧

嘉靖初魏國公侵武進縣福教寺田僧乃棄去

後過寺題詩云云

殘山剩水一荒基  
古寺烟籠白塢低  
燕子不知身是客  
秋風還戀舊巢泥

黃圖雜誌

直沽櫂歌

三首

天妃廟對直沽開  
津鼓連船柳下催  
釀酒未終舟子報  
舵樓黃葉早飛來

雲帆十幅下津門  
日落潮平不見痕  
葦淀茫茫何路泊  
一燈明處有漁村

靡蕪楊柳綠依依  
檣燕檣烏立又飛  
賺得南人歸思緩  
白魚紫蟹四時肥

郭縣志

白河漁舟

溶溶漾漾白河流  
點點輕鷗上水浮  
遙望孤燈明滅處  
葦花斷岸一漁舟

浦城志

南浦

南浦春流漲綠波  
溶溶漾漾浴鷗多  
銷魂尚計江淹賦  
碧草青苔送別何

資江石刻

書石溪亭

桃花依舊放山青  
曲几焚香對畫屏  
記得當年春雨後  
燕泥時汚石溪亭

洞庭老人

卓彥恭月夜泊洞庭有老人盪小舟過之歌詩

金瓶梅詞話卷九十六  
云云見小草齋詩話

歌

八十滄浪一老翁  
蘆花江上水連空  
世間多少乘除事  
良夜月明收釣筒

玉堂逐客

題西禪寺詩

隔江人唱浪淘沙  
月上梧桐影未斜  
客到潯陽談往事  
青衫無淚濕琵琶

耳園公

君山

山色湖光日漸曛誰將玉珮弔湘君  
天風一夜連湖起吹落蒼梧萬里雲

花鏡雋聲

踏燈詞

髻挽烏蠻試晚妝衫裁白氎學霓裳  
私邀女伴門前立不避燈光避月光



盤江逋客

題分水關

一道泉分兩道泉層層松栝翠參天  
鷓鴣聲裏山無數  
合向誰家草閣眠

碧岡道人

堯渡

秋水初平露石磯堯城渡口柳依依  
無端隔岸漁歌起  
白鳥一雙撲鹿飛

不出戶庭錄

題陳山壁

啓牕日日對青山  
山色青青不改顏  
我問青山何日老  
青山問我幾時閒

陳墅里人

江陰陳墅里有郭姓者失其名題詩於壁

春日偶題

細細冥冥濕燕泥  
棟花香暖鶉鳩啼  
籬邊笋迸無多日

恰與茅簷一丈齊

電白老兵一首

題城樓

畫角吹來歲月深  
譙樓無古亦無今  
不如歸我龍山去  
萬竹青青何處尋

靈谷寺壁上詩

九日

風雨蕭蕭戶未開  
忽聞隣叟負薪回  
自言今歲登高便

曾上鍾山絕頂來

鍾山野老

一首

風香閣

風香高閣倚層崖  
一老扶筇下蘚階  
獵火夜來驚鹿過  
松根拾得舊銀牌

高百戶

百戶嘉興人遺其名

閩歸簡吳巨手

半牀書卷剩山河如此歸來可奈何便欲與君同一醉  
梅花不比舊時多

湘中女子

繫左臂詩

生來誰惜未簪弁身沒狂瀾命不齊河伯有靈憐薄命

東流直繞洞庭西

王仰止云湘中女子名氏不傳第知為湘江人其沉江也逆流至湖南水

濱顏色如生左臂纏素帕  
十絕句閩人林古度跋之

明詩綜卷九十六

欽定四庫全書

明詩綜卷九十七

翰林院檢討朱彝尊編

靜志居詩話明以賈客而稱詩者衆矣若歙州之鄭作程誥龍游之童珮皆賈也然鄭程皆受學于李空同童執經于歸太僕則不得以賈人目之故錄雜流自谷淮以下而儼從之能詩者

附焉

谷淮 三首

淮字文東秦中賈人客淮揚間傭書給事澄江

張學士家

顧玄言云谷郎能仿文徵仲書法兼善音律日以文翰為業其家詆為書

凝其詩殊有雅致

寄遠

瓊花臺上雨初收  
黃歇山前水急流  
莫道別來鄉國遠  
南江愁是北江愁

病中

一貧成病竟年年  
愁入蒼茫歲暮天  
客至擁衾聊起坐  
冷風吹雨濕窗前

題畫

十月山家落木稀  
高窓終日見雲飛  
柴關地僻無人到  
獨向峰頭抱犢歸

李東白 一首

東白京山人為衣工

姚園客云東白黃鶴樓詩秋在仙人鐵笛中一語可

云絕唱李宗定恒誦之後游秣陵歸舟至雲夢澤中萬臺寺自吟云好水好山來路遠秋風秋雨到家遲拍手一笑墮水而死

登黃鶴樓



西望家山一改容白雲飛盡楚江空興饒老子胡牀上  
秋在仙人鐵笛中鄂渚霜花沿岸白漢陽楓樹隔江紅  
倚闌拍手招黃鶴千古登臨感慨同

盧 澐 一首

澐字宗潤鄞人義烏縣吏有月漁集

詩話月漁託身文無害尋即棄歸以醫自給有  
邀之治疾者見壁上詩和之繞榻吟哦至旦主  
人以為怪不服其藥每得金置袖中為人探去  
不知知亦不問也故人有知黟縣事者徒步萬  
山中訪之距縣百里而病夜夢挽其髮盡變為  
黃絲寤而語人曰色絲為絕吾死矣夫果死于

客舍平居語沈嘉則曰古人旅葬裸葬無所不可何必故鄉嘉則因買山於休寧東郭外葬焉  
題曰詩人  
盧九之墓

### 西亭同朱近臣送沈嘉則

送君江山行路近梅根渚雨急天欲昏不盡別時語

周俊  
五首

### 俊字伯英江陰賈客有南岑集

詩話伯英詩頗清越如海風吹雨散江月伴潮  
生亂鷗千樹曉新水一篙秋市酒薄於水漁燈  
密似螢風前雙鬢逢秋短海上  
孤城過雨寒俱出塵埃之表

蕪城對酒寄懷張淡雲校書

樓上春雲黯夕陰  
折花載酒偕同心  
芙蓉繡幄隱紅燭  
美人一笑輕千金  
南浦別離情脈脈  
柳花繚亂風無力  
愁來獨上廣陵城  
江水微茫天一色

吳陵暑夕

斷虹收宿雨  
大火欲西流  
一片水浮月  
三更人倚樓  
兼葭迷白露  
蟋蟀響清秋  
惆悵江南北  
年年事薄游

鵝鼻磯

細雨晚山晴殘霞映江樹不見垂綸人寒潮自來去

春日雜詠

春來懶慢起常遲六尺枯藤強自支忽見柳花飛作雪  
小橋回首立多時

贈張淡雲

星河淡淡夜迢迢深院涼生動絳綃傳得揚州新樂府  
倩誰人並坐吹簫

黃徽

一首

徽字季美杭州人為閩賈沈翁贅壻繼其業有

穀音

詩話季美詩何侍郎稭孝稱之為作詩賈傳其略曰唐人以詩名桑門閨秀皆進乎技賈人缺焉季美詩不妨賈賈不俚詩遂無前人其賞譽若是

竹崎

水口薜亭官長在搜鹽日午喚停船平明舍櫂山城外  
竹轎迎人又索錢

李 估 一首

估扶溝人

江行有懷

醉起意不盡江邊尋杜蘅折來何所寄游子在西京惜  
別三春晚窮年百慮生日斜空悵望一水隔盈盈

馬來如一首

來如內鄉人翰林李衮之僕

江上懷吳人朱侍山久羈均陽

江草江花一水長憐君何事滯均陽逢人為報鄉園侶

吳客而今作楚狂

李英 三首

英字少芝以青衣給事南海歐大任

俞汝成云計有功唐

詩紀事二百餘年詩人千一百五十家而卷末有僕二人一為咸陽郭氏捧劍之童一為池陽刺史戟門門子朱元余輯盛明百家詩僅得李英一人可以為難矣宋轅文云李生詩清勁可誦能宗其主人

初去故園留別諸友

風烟一以別把酒戀同游人去江樓晚帆飛海國秋青

山馳遠夢黃菊動離愁曾是滄洲客能無念白鷗

秋思

曾是滄洲舊釣徒西風落魄寄江都望中故國千山阻  
別後經年一字無庾嶺烟霞秋思遠楚天風雨暮帆孤  
誰憐飄泊他鄉客不為尊鱸滯五湖

十月京師紀事

蕭關風急馬頻嘶四塞河山動鼓鼙獨立高臺望烽火  
蘆花多在薊門西



林汝元 二首

汝元閩王粹夫家青衣

詩話錫山俞汝成輯盛明百家詩錄青衣一人  
南海李英也他無聞焉後人選詩又益以二人  
扶溝李佑內鄉馬來如余錄詩綜又益一人閩  
林汝元也聞閩中青衣善詩者不止汝元尚有  
陳香初陳竹逸鄭蘭子三人未詳其名澄江楓  
葉老斷岸菊花疎香初句也月明黃葉露花隱  
赤闌橋蘭子句也古墓梨花鸛鵲雨荒原麥  
穗鷓鴣天竹逸句也附疏于此當博訪之

溪行

雪壓梅花破霜侵楓葉稀林間黃犢卧沙際白鷗飛水

急灘聲亂溪迴樹影微前峰新月吐樵子蹋歌歸

京口夜泊

隱隱漁歌隔岸聽娟娟新月照中泠江南風景今宵始  
回首瓜州一抹青

胡梅二首

梅字白叔吳人給事徐通政申宅晚瞽以醫自  
給自號清壑道人

詩話白叔幼而秀穎以孤旦登場四坐叫絕徐  
通政維嶽俾掌書史嘗取通政友人赤牘畀之

炎火為通政誦之不遺一字有納妾者白叔  
賦催粧詩其人擊節於是詩名藉甚而選錄  
其詩目之曰山人予取以附  
雜流之末蓋不敢沒其實云

沈璧甫自城南移居虎丘和周安期韻

君住城南已數年今移虎阜寺門前紅疎未補薔薇架  
綠滿初停茉莉船雨過峰頭流一壑月明隄上聽三絃  
酒壚餅肆皆隣近我欲頻來莫惜錢

曉飯小孤山下

兩岸黃蘆雪滿船推蓬曉爨鷺鷥前小孤山下風初定

江面剛生一寸烟


吳忠一首

忠華亭姚元龍宅青衣陳徵君繼儒賞其桃花  
詩勸其辭主人送至小崑山為焚香道者

詩話余既錄二李一馬之詩又益以胡白叔閱  
東吳舊話又得吳忠一人按徐文長逸藁有詩  
云南海大夫歐泉州處士尤泥中雙綠鬢詩伴  
兩蒼頭自注尤山人侍者范鹿能詩不減歐損  
伯之僕惜其  
稿不得見也

桃花

游子訪桃源桃源在深處不用問漁郎谷口隨花去



明詩綜卷九十七

欽定四庫全書

集部

明詩綜卷九十八至一百

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘曾起

騰錄監生臣楊恪

欽定四庫全書

明詩綜卷九十八

翰林院檢討朱彝尊編

靜志居詩話明制南北都各立教坊司北有東  
西二院南有十四樓其後南都舊院極盛成弘  
間院中色藝優者結二三十姓為手帕姊妹每  
月節以春樂巧具較核相關名為盒子會沈啓  
南曾為作圖係以長句然青樓之題詠無聞也  
隆萬以來冶游漸盛浙有沈水部某託名水華  
梅史以北京東西院妓郝筠等四十人配作葉  
子牌金沙曹編修大章立蓮臺新會以南曲妓  
王賽玉等一十四人比諸進士榜一時詞客各  
狎所知假手作詩詞曲子以長具聲價於是北

里鮮有不作韻語者其偽真無由而辨識矣姑從諸家選本綴錄成卷

趙麗華 二首

麗華字如燕小字寶英南院妓自稱昭陽殿中

人

詩話如燕父銳以善歌樂府供奉康陵如燕年十三錄籍教坊能綴小詞被入絃索予嘗得其書畫扇楷法絕佳後題云乙卯中秋同西池徵君質山學士集海濱天香書屋書此竟聞任兵憲在陸涇壩禦倭大捷奏凱回戈亦快事也沈嘉則為作傳有云趙雖平康美人使具鬚眉當不在劇孟朱家下今即其題扇數語豪宕可知賦別一詩亦手書便面者



荅人寄吳牋

感君寄吳牋牋上雙飛鵲但效鵲雙飛不效吳牋薄

席上賦別

妾舟西發君舟東頃刻天生兩處風此去雲山天際渺  
寸心千里附冥鴻

朔朝霞

一首

朝霞金陵妓

送人

秋風江上送君舟落葉江楓總別愁解纜不知人去遠  
凭闌猶倚夕陽樓

姜舜玉一首

舜玉自號竹雪居士南京舊院妓

花源逢顧何二使君作

仙源凡幾曲夾岸桃花開忽漫逢劉阮殷勤勸酒杯

徐翩翩一首

翩翩字飛卿一字驚鴻南院妓有集

詩話翩翩年十六時名未起學琴不能操緩學曲不能按板因舍而學詩謝少連於衆中見之此陳王所云翩若驚鴻者也由是人咸以驚鴻目之有妹亭亭字若鴻亦慧黠翩翩晚嫁江陰郁生郁卒還秣陵翩翩為尼居蓮子營小菴以老

### 江陰送顧太學

一日發江口五日下午長洲可惜送君淚不隨江水流

### 趙彩姬 四首

彩姬字今燕南院妓冒伯麇云較書容與溫文清言楚楚徐孺老去枇杷

花下閉門居風流猶可想也

詩話今燕張幼于所狎名冠北里時曲中有劉董羅葛段趙何蔣王楊馬諸先後齊名所稱十二釵也晚居琵琶巷口冶游少年號曰閉門趙四具才技頗勝諸人

暮春江上送別

一片潮聲下石頭江亭送客使人愁  
可憐垂柳絲千尺不為春江綰去舟

憶故居

柳絮春泥玉壘封珠簾深鎖暮烟濃  
分明記得雙棲處夢繞青樓十二重

送幼于還吳門

花前雙淚濕衣裾把酒江亭落照餘此去吳門霜月滿  
逢人好寄洞庭書

寄陳八玉英時留姑蘇

何處簫聲獨上樓傷心桃葉水空流一從南國春歸後  
無復佳人字莫愁

馬守真 一首

守真字湘蘭一字玄兒又字月嬌金陵妓有集

詩話湘蘭貌本中人而放誕風流善伺人意性復豪俠恒揮金以贈少年感吳人王伯穀解墨郎之阮欲委身焉伯穀不可萬厯甲辰秋伯穀年七十相蘭買樓船載小鬟十五造飛絮園置酒為壽晨夕歌舞流連者累月亦勝引也伯穀序其詩大略云秣陵佳麗之地青樓狹邪之間桃葉題情柳絲牽恨胡天胡帝為雨為雲有美一人風流絕代問姓則千金燕市之駿託名則九畹湘江之英輕錢刀若土壤翠袖朱家重然諾如丘山紅妝季布爾其擲琉璃之管字字風雲擘玉葉之牋言言月露翻庭花之舊曲按子夜之新聲奚特錦江薛濤標書記之目金昌杜韋惱刺史之腸而已哉曲中傳為佳話

自君之出矣

自君之出矣不共舉瓊卮酒是消愁物能消幾箇時

姚國

客云誦之  
令人酸楚

朱無瑕

一首

無瑕字泰玉金陵妓有繡佛齋集

秋閨曲

芙蓉露冷月微微小苑風清鴻鴈飛聞道玉門千萬里  
秋來何處寄寒衣

孫瑤華

一首

瑤華字靈光金陵妓歸新安汪景純有遠山樓  
橐

次韻汪仲嘉戲代蘇姬寄吳郎之作

由來歡愛說新知空結同心不自持  
山上薜蘿寧再遇  
西陵松柏詎相期  
羅襦明月君休繫  
紈扇秋風妾不辭  
極目自憐春欲盡  
流鶯飛處草離離

崔重文 一首

重文字媚兒一字媽然南院妓



別黃玄龍

楓落鴉翻秋水明長橋獨樹古今情尋常歌板銀鑿地  
從此傷離不忍行

鄭如英一首

如英字無美桃葉妓

詩話無美以韶豔聞曲中呼為妥十二  
妥其小名也詩筆流便但不暇持擇耳

雨中賦別

執手難分處前車問板橋愁隨風雨長魂為別離消客

路雪兼樹妝樓暮又朝心旌誰復定幽夢任搖搖

景翩翩二首

翩翩字三昧

一作驚鴻

建昌妓嫁丁長發丁為人誣

訟于官景竟自經有散花吟

詩話王伯穀題散花吟云閨中有女最能詩寄我一部散花詞雖然未見天女面快語堪當食荔支翩翩家本盱江時游建安故伯穀誤以為閨中女子也時又有沙飄飄新都謝少連撰季漢書成其友釀金賀之布席齊王孫第四方之士會者百人選六院麗人侑酒飄飄為冠評者比之揚州蕃禧觀瓊花末有兩樹云

襄陽蹋銅蹄

駿馬蹋銅蹄金羈豔隴西郎能重意氣妾豈向人啼

與蘇生話

十日平原飲三秋江上船一經搖落後明月幾回圓

薛素素 一首

素素小字潤娘嘉興妓有異才數嫁皆不終有

南游草

詩話薛五較書有十能詩書琴奕簫而馳馬走  
索射彈尤絕技也予見其手寫水墨大士甚工

董尚書未第日授書禾中見而愛之為作小楷  
心經兼題以跋至山水蘭竹下筆迅掃無不意  
態入神聞在京師挾彈走馬能以兩彈丸先後  
發使後彈擊前彈碎于空中又置一彈于地以  
左手持弓向後以後手從背上反引其弓以擊  
地下之彈百不失一嘗置彈于小婢額上彈去  
而婢不知江都陸無從歌云酒酣請為挾彈戲  
結束單衫聊一試微纏紅袖袒半鞦側度雲鬟  
引雙臂侍兒拈丸著髮端回身中之丸並墜言  
遲更疾却應手欲發未停偏有致范夫人贈詩  
云重開別院貯文君寶絡千金換翠裙非雨非  
雲香滿路前身應是薛靈芸尋為李征蠻所壁  
又嘗侍沈孝廉景倩巾櫛其畫象傳入蠻峒西  
陽彭宣慰深慕之費金錢無算致之不得也

春日過茅山

參差臺殿闕靈蹤  
句曲茅君次第逢  
洞口鶴規曾過客  
日中人上最高峰  
華陽澗水桃千樹  
舊館壇碑闕幾重  
遙望金沙何處是  
浮圖千尺罩烏龍

張回一首

回字淵如一字觀  
若金陵妓

送別賦得帆影

勞勞亭上別無計  
共君歸一葉隨風去  
孤帆挾浪飛目  
窮河鳥盡望斷浦  
雲非後夜相思處  
傷心隔翠微

羽孺一首

孺字素蘭一字靜和常熟人生不識姓善音律  
推律得羽聲遂以為氏後為人所殺有詩集

柳

草閣疎林迴簷前繞綠楊章臺憐御苑灞岸惜他鄉繫  
馬青春晚藏烏子夜長玉關頻折贈離思斷人腸

周文一首

文字綺生嘉興妓

沈宛君云綺生初出平康終  
歸匪匹鬱志而死遺藁甚多

不傳良可惜也

詩話綺生善小詩沈純父林居端午召客呼之  
侑酒不至次日始來問其故曰昨偶席上賦詩  
未就耳純父曰爾能詩試即景以五月六日為  
題綺生朗吟云酒剩蒲觴冷門懸艾虎新坐客  
咸擊節由是詩名大起縉紳若高玄期李君實  
皆與酬和綺生嘗有句云掃眉才子多相忌未  
敢人前說較書蓋自傷也近見鄉先達所選詩  
謂為松陵一元氏負之而趨悒鬱而死所云一  
元氏者除名會元沈同和志學也予於乙酉冬  
猶及見之酒間談論援今證古娓娓不休亦未  
至以五七言讀詞回環迄不  
能句第於帖括則全不解耳

# 詠懷

幾點愁人淚不許秋風吹吹到長江裏江流無盡期

呼文如一首

文如小字祖江夏營妓與丘謙之綢繆和荅有

遙集編

詠庭中安石榴呈丘生

安石孤根託謝庭合歡枝上日青青懸知雨露深如許  
結子明朝似小星

王微六首



微字修微揚州妓飯心禪寂自號草衣道人初  
歸歸安茅元儀晚歸華亭許譽卿皆不終有期

山草樾館詩集

重過雨花臺望江有感

春姿靜東岑雲影結遙祭坐卧高臺空不知翠微半落  
花自古今啼鳥變昏旦撫化良易遷卽事聊成玩况乃  
晴江開淥波正拍岸

有人以斷腸草寄怨予偶見戲反之

木名有連理草名有宜男花有枝並蒂禽有翼鷦鷯西  
方鳥共命東海魚比目輕鸞千二百鴛鴦三十六相思  
為唐殿合歡是漢宮雀屏開甲乙龍劍匣雌雄之子賦  
斷腸稱物作苦語聊拈佳耦名其他未遑舉

夾山漾別陳仲醇

夾山寒水落木葉下紛紛斜日已難別扁舟況送君瑤  
華一以折零落不堪聞為我題紈扇新詩寄白雲

仙家竹枝詞

幽蹤誰識女郎身  
銀浦前頭好問津  
朝罷玉宸無一事  
壇邊願作埽花人

憶江南

寒沙日午霧猶含  
蕭瑟風光三月三  
撲地柳花新燕子  
不由人不憶江南

湖上早起

中流何處聽雞鳴  
只看船窗烟霧生  
剛到五更翻睡去  
急披衣起已天明

蔡彬一首

彬字清卿江都妓

贈別

傷情不奈出宜春  
遙見離亭倍愴神  
昨夜樓頭好明月  
今宵分照遠行人

郝婉然一首

婉然字蕊珠京師珠市妓有詞鸚集

鳳皇臺

雨過荒臺春草長浮雲暗處是斜陽杏花零落知多少  
黃蝶翻飛野菜香

李貞儷

一首

貞儷字澹如桃葉妓有韻芳集

月夜有懷

不見風前舊令君滿庭霜月白於雲仙居只隔清谿曲  
此夜鐘聲應共聞

茹瓊

一首

瓊錢塘妓許歸金華唐生生負約嘔血卒

元夕

湖南湖北雪初消  
畫鼓春幡總寂寥  
不是鄰家燈火近  
那知今夕又元宵

楊宛

四首

宛字宛叔金陵妓有鍾山獻正續集

茅止生云宛叔歸余

年纔十六能讀書工小楷其於詩游戲涉略若不經意然無枯澀之色鮮潤流利  
鍾廣漢云止生之嬖宛叔類燕人之感易安得時以蘭湯浴之

詩話止生得宛叔深賞其詩序必稱內子既以  
謫荷戈則自詡有詩人以為成婦兼有句云家  
傳傲骨為迂叟帝賚詞人作細君可云愛惜之  
至顧宛叔恒思背之秋懷詩云獨自支頤獨自  
愁深情欲語又還羞從來薄命應如此敢比鴛  
鴦到白頭棘心已露矣止生亡後思倚國戚田  
弘遇以其賄遷不期弘遇第以衆人畜之尋俾  
其授琴書於季女甲申冠髮宛叔攜田氏女至  
金陵匿山村中盜突入其室欲汙田氏女女不  
從宛叔從旁力衛之遂同遇害詩如江清風定  
候山碧雁來天亦稱佳句其行楷特  
工能於瘦硬中逞姿媚洵逸品也

## 種桐

靜居無寄懷種桐廣除內桐高盈丈餘風露相吸逮本

以遲鳳棲鳳樓不可再我聞古良士往往思其外預愁  
斷為琴知音復誰在

哭侍兒湘雲

湘水千年在湘雲去不回牀頭鍼線帖此後更誰開

春日有感

翠館紅樓白石橋高花低柳自飄飄畫闌幾處無人到  
多少春光暗裏銷

次止生七夕見懷韻



遙遙望斷白蘋洲  
惟見銀河一派流  
那得閒情還乞巧  
夢魂尋遍木蘭舟

顧娟娟一首

娟娟嘉興妓

詩話娟娟居蘇小小墓東北短小穠粹妙歌舞  
雙鞬柔弱胡旋燈前觀者靡不歎絕間作小詩  
以書法不工偶對人口  
占而已崇禎末年卒

贈別

南國相思子  
西番篤耨香  
留君充雜佩  
休賭紫羅囊

明詩綜卷九十八